

【序分】

如是我聞：一時、佛在舍衛國，祇樹給孤獨園。

與大比丘僧，千二百五十人俱。皆是大阿羅漢（之位，其德為）眾所知識。

長老舍利弗（此云身子），摩訶目犍連（大采菽氏），摩訶迦葉（大飲光），摩訶迦旃延（大文飾），摩訶拘絺羅（大膝），離婆多（星宿），周利槃陀伽（繼道），難陀（喜），阿難陀（慶喜），羅睺羅（覆障），憍梵波提（牛呵），賓頭盧頗羅墮（不動利根），迦留陀夷（黑光），摩訶劫賓那（房宿），薄拘羅（善容），阿[少]兔樓陀（無貧）如是等諸大弟子。

并諸菩薩摩訶薩：文殊師利（此云妙德）法王子，阿逸多（此云無能勝，彌勒菩薩之名）菩薩，乾陀訶提（此云不休息）菩薩，常精進菩薩，與如是等諸大菩薩。

及釋提桓因等，無量諸天大眾俱。

爾時佛告長老舍利弗：從是（娑婆世界）西方，過十萬億佛土，有世界，名曰極樂。其土有佛。號阿彌陀，今現在說法。

【正宗分】

舍利弗！彼土何故名為極樂？其國眾生，無有眾苦，但受諸樂，故名極樂。

又、舍利弗！極樂國土，七重欄楯（以嚴際畔），七重羅網（以嚴空界），七重行樹（以嚴露地）。皆是四寶。周匝圍繞。是故彼國，名為極樂。

又、舍利弗！極樂國土，有七寶池，八功德水，充滿其中。池底純以金沙布地。四邊階道，金、銀、琉璃、玻瓈合成。上有樓閣，亦以金、銀、琉璃、玻瓈、碑磬、赤珠、瑪瑙、而嚴飾之。池中蓮華，大如車輪，青色青光，黃色黃光，赤色赤光，白色白光，微妙香潔。

舍利弗！極樂國土，成就如是功德莊嚴。

又、舍利弗！彼佛國土，（空中）常作天樂，（下是）黃金為地。（中間）晝夜六時，雨天曼陀羅華，（上嚴空界，下嚴金地。）其土眾生，常以清旦，各以衣祴，盛眾妙華，供養他方十萬億佛，即以食時，還到本國，飯食經行。

舍利弗極樂國土，成就如是功德莊嚴。

復次、舍利弗！彼國常有種種奇妙雜色之鳥，白鶴、孔雀、鸚鵡、舍利、迦陵頻伽，共命之鳥，是諸眾鳥，晝夜六時，出和雅音；其音演暢：五根、五力、七菩提分、八聖道分，如是等法。其土眾生聞是音已，皆悉念佛、念法、念僧。

舍利弗！汝勿謂此鳥，實是罪報所生。所以者何？彼佛國土，無三惡道。

舍利弗！其佛國土，尚無惡道之名，何況有實？是諸眾鳥，皆是阿彌陀佛欲令法音宣流，變化所作。

舍利弗！彼佛國土，微風吹動諸寶行樹，及寶羅網，出微妙音，譬如百千種樂，同時俱作；聞是音者，自然皆生念佛，念法，念僧之心。

舍利弗！其佛國土，成就如是功德莊嚴。

舍利弗！於汝意云何？彼佛何故號阿彌陀？

舍利弗！彼佛光明無量、照十方國，無所障礙，是故號為阿彌陀。

又、舍利弗！彼佛壽命及其人民（壽命，皆）無量無邊阿僧祇劫，故名阿彌陀。

舍利弗！阿彌陀佛成佛已來，於今十劫。

又、舍利弗彼佛有無量無邊聲聞弟子，皆阿羅漢，非是算數之所能知。諸菩薩眾，亦復如是。

舍利弗！彼佛國土，成就如是功德莊嚴。

又、舍利弗！極樂國土，眾生（纔）生（彼土）者，皆是（三種）阿鞞跋致；其（三不退）中多有一生補處，其數甚多，非是算數所能知之，但可以無量無邊阿僧祇說。

舍利弗！（如上無上大事因緣，）眾生（幸得）聞者，應當發願，願生彼國。所以者何？得與如是（不可算數一生補處）諸上善人，俱會一處。

舍利弗！不可以少善根福德因緣，得生彼國。

舍利弗，若有善男子、善女人，聞說阿彌陀佛，執持名號，若一日，若二日，若三日，若四日，若五日，若六日，若七日，一心不亂，其人臨命終時，阿彌陀佛與諸聖眾，現在其前，是人終時，心不顛倒，即得往生阿彌陀佛極樂國土。

舍利弗！我見是利，故說此言。若有眾生，聞是說者，應當發願，生彼國土。

【流通分】

舍利弗！如我今者讚歎阿彌陀佛不可思議功德之利；東方亦有阿閼鞞佛，須彌相佛，大須彌佛，須彌光佛，妙音佛，如是等，恆河沙數諸佛；各於其國，出廣長舌相，徧覆三千大千世界，說誠實言：「汝等眾生，當信是稱讚不可思議功德一切諸佛所護念經。」

舍利弗！南方世界，有日月燈佛，名聞光佛，大燄肩佛，須彌燈佛，無量精進佛，如是等，恆河沙數諸佛，各於其國，出廣長舌相，徧覆三千大千世界，說誠實言：「汝等眾生，當信是稱讚不可思議功德一切諸佛所護念經。」

舍利弗！西方世界，有無量壽佛，無量相佛，無量幢佛，大光佛，大明佛，寶相佛，淨光佛，如是等，恆河沙數諸佛，各於其國，出廣長舌相，徧覆三千大千世界，說誠實言：「汝等眾生，當信是稱讚不可思議功德一切諸佛所護念經。」

舍利弗！北方世界，有燄肩佛，最勝音佛，難沮佛，日生佛，網明佛，如是等恆河沙數諸佛，各於其國，出廣長舌相，徧覆三千大千世界，說誠實言：「汝等眾生，當信是稱讚不可思議功德一切諸佛所護念經。」

舍利弗！下方世界，有師子佛，名聞佛，名光佛，達磨佛，法幢佛，持法佛，如是等恆河沙數諸佛，各於其國，出廣長舌相，徧覆三千大千世界，說誠實言：「汝等眾生，當信是稱讚不可思議功德一切諸佛所護念經。」

舍利弗！上方世界，有梵音佛，宿王佛，香上佛，香光佛，大燄肩佛，雜色寶華嚴身佛，娑羅樹王佛，寶華德佛，見一切義佛，如須彌山佛，如是等恆河沙數諸佛，各於其國，出廣長舌相，徧覆三千大千世界，說誠實言：「汝等眾生，當信是稱讚不可思議功德一切諸佛所護念經。」

舍利弗！於汝意云何？（稱讚功德之名，上來已詳言矣；）何故名為一切諸佛所護念經（耶）

舍利弗！若有善男子、善女人，聞是經受持者，及聞諸佛名者，是諸善男子、善女人，皆為一切諸佛之所護念；皆得不退轉於阿耨多羅三藐三菩提。

是故、舍利弗！汝等皆當信受我語，及諸佛所說。

舍利弗！若有人已發願、今發願、當發願，欲生阿彌陀佛國者，是諸人等，皆得不退轉於阿耨多羅三藐三菩提，於彼國土，若已生，若今生，若當生。

是故舍利弗，諸善男子、善女人，若有信者，應當發願，生彼國土。

舍利弗！如我今者，稱讚諸佛不可思議功德，彼諸佛等，亦稱讚我不可思議功德，而作是言：「釋迦牟尼佛，能為甚難希有之事：能於娑婆國土，五濁惡世一劫濁，見濁，煩惱濁，眾生濁，命濁一中，得阿耨多羅三藐三菩提；為諸眾生，說是一切世間難信之法。」

舍利弗！當知我於五濁惡世，行此難事；得阿耨多羅三藐三菩提，為一切世間說此難信之法，是為甚難！

佛說此經已。舍利弗，及諸比丘，一切世間：天、人、阿修羅等，聞佛所說，歡喜信受，作禮而去。